

दिनांक 27.05.2025

समय: 18.45 बजे

- प्रधानमंत्री नरेन्द्र मोदी कह्यो—भारत शांति पसंद देश है अर दुनिया रा भला मांय योगदान सागे आगे बढ़बा री मंशा राखे हैं
- राज्यपाल हरिभाऊ बागडे जनता रा सामाजिक अर माली स्तर मांय सुधार सारु सरकारी योजनावां ने खास बतायीं
- राज्य मांय कोरोना रा नुवा मामला सामी आया— हालांकि वायरस री आ भांत घणी नुकसानदायक नी हैं
- जयपुर-दिल्ली नेशनल हाईवे नम्बर 48 माथे बस अर ट्रेलर री टक्कर रे कारण तीन जणां री मौत अर चौबीस जणां जख्मी व्हायें
- एशियाई एथलेटिक्स चैंपियनशिप मांय भारत रा गुलवीर सिंह दस हजार मीटर दौड़ मांय सोना रो तमगो जीत्यों

000

प्रधानमंत्री नरेन्द्र मोदी कह्यो है के पाकिस्तान री भारत रे खिलाफ कथित परोक्ष लड़ाई असल मांय लड़ाई री सोची-समझी रणनीति हैं वे आज गुजरात रा गांधी नगर मांय राखी ज्यी जनसभा मांय बोल रह्या हां श्री मोदी कह्यो के छह मई रा वाक्यां पाछे भारत ने आतंकी गतिविधियां मांय पाकिस्तान री शह रा सबूत देवण री जरूरत नी हैं

प्रधानमंत्री कह्यो के भारत किण ई सागे दुश्मनी री मंशा नी राखे हैं वे कह्यो के देश दुनिया रा भला मांय योगदान सागे बरकत री उम्मीद राखे हैं प्रधानमंत्री कह्यो के देश री आजादी रा सौ साल पूरा व्हेवण ताई विकसित भारत बणावण रो लक्ष्य हासिल करण मांय कोई समझौतो नी कर्यो जावेलां वे कह्यो के ओ सपनो सांचो करण मांय देश रा हर रेहवासी ने वां रो काम करणो व्हेलां श्री मोदी कह्यो के भारत ने दुनिया री तीन मोटी माली व्यवस्थावां मांय भेलो करण सारु दूजा अर तीजा लेवल रा शहरां रो माली विकास घणो खास हैं

.....

इण ऊं पैली प्रधानमंत्री विकास री न्यारी-न्यारी परियोजनावां रो उद्घाटन कीनो अर नुवी परियोजनावां रा काम री नींव रखीं

000

रक्षा मंत्री राजनाथ सिंह बेहतर बणायी ज्यो मध्यम दर्जा रा लड़ाकू विमान — ए.एम.सी.ए. कार्यक्रम निष्पादन मॉडल ने मंजूरी दे दीनी हैं ई मॉडल रो मकसद देश मांय रक्षा क्षमतावां ने बधावो देवण अर मजबूत घरेलू एयरोस्पेस औद्योगिक ईको सिस्टम विकसित करणो हैं

000

केंद्रीय शिक्षा मंत्री धर्मेन्द्र प्रधान नुवी शिक्षा नीति ने पारंपरिक मूल्यां ने बचावण सागे आवता बगत सारु खास बतायी हैं वे आज नई दिल्ली मांय एक मीडिया नेटवर्क रा शिक्षा सम्मेलन मांय बोल रह्या हां श्री प्रधान कह्यो के राष्ट्रीय शिक्षा नीति 2020 आगे री सोच रा ढांचा रा तौर ऊं सामी आयी हैं वे कह्यो के भारत बुनियादी ढांचा विकास, समावेशिता अर आधुनिकीकरण माथे ज़ोर देता थकां भणार्ई-लिखाई रा हलका मांय खूब आगे बढ़्यो हैं

000

राज्यपाल हरिभाऊ बागडे कह्यो है के जनता रा सामाजिक अर माली स्तर मांय सुधार लावण रा मकसद ऊं सरकार री ओर ऊं चलायी जा रही योजनावां घणी खास हैं वे आज सलूमबर मांय जिला स्तर रा अहलकारां सागे मीटिंग मांय बोल रह्या हां श्री बागडे अहलकारां ने योजनावां रो फायदो पात्र लोगां ताई पूगावण बाबत् कह्यो राज्यपाल कह्यो के देश अर समाज री बरकत सारु भणार्ई-लिखाई जरूरी है अर हर तबका रा बच्चां ने गुणवत्ता वाळी शिक्षा मिलणी चाहिजे श्री बागडे आज डूंगरपुर मांय ई अहलकारां सागे मीटिंग कीनी अर कलेक्ट्रेट परिसर मांय पौधा रोप्यां राज्यपाल दिव्यांगजन ने बिजली ऊं चालण वाळा वाहन ई दीनां

000

केन्द्रीय प्रत्यक्ष कर बोर्ड—सीबीडीटी ई साल री इन्कम टैक्स रिटर्न—आईटीआर दाखिल करण री आखिरी तारीख 31 जुलाई ऊं बधा र 15 सितम्बर कर दीनी हैं सीबीडीटी कानी ऊं जारी बयान रे मुजब इण ऊं आई.टी.आर. फॉर्म मांय बदलाव, सिस्टम डेवलपमेंट री जरूरतां अर टी.डी.एस. क्रेडिट रिफ्लेक्शन रे कारण लोगां ने बत्तो बगत मिलेलां

000

राजस्थान माध्यमिक शिक्षा बोर्ड ई साल लीरीजी दसवीं कक्षा री परीक्षा रा नतीजा रो काल सिंज्यां चार बज्यां ऐलाण करेलां शिक्षा मंत्री मदन दिलावर कोटा रा कलेक्टर रा दफ्तर ऊं वीडियो कॉन्फ्रेंसिंग रे जरिए अजमेर बोर्ड ऊं जुड़ र नतीजा रो ऐलाण करेलां बोर्ड रा सचिव कैलाश चंद शर्मा बतायो के नतीजा रा ऐलाण री सगळी तैयारियां पूरी कर लीरीजी हैं ई साल मैट्रिक रो इम्तिहान देवण सारु दस लाख छियानवें हजार पिचासी (10,96,085) अर प्रवेशिका परीक्षा मांय सात हजार तीन सौ चौबीस (7, 324) विद्यार्थी अर्जी दीनी हीं

000

राज्य मांय कोरोना रा नुवा मामला सामी आया हैं स्वास्थ्य निदेशक रवि प्रकाश शर्मा आकाशवाणी सागे बातचीत करता थकां बतायो के कोरोना वायरस री आ भांत घणो नुकसान नी करे है अर इण ऊं घबरावण री जरूरत नी हैं

000

राज्य मांय नगरीय निकायां रा ओजू गठन अर सीमांकन रा प्रस्तावां माथे विचार सारु आज जयपुर मांय मंत्रीमण्डलीय उप समिति री मीटिंग राखी ज्यीं मीटिंग मांय अजमेर, कोटा, उदयपुर अर बीकानेर संभाग रा नगरीय निकायां रा प्रस्तावां रा बारा मांय चर्चा करी ज्यीं मीटिंग मांय समिति रा संयोजक नगरीय विकास मंत्री झाबर सिंह खर्वा अर समिति रा सदस्य वनमंत्री संजय शर्मा अर सहकारिता मंत्री गौतम कुमार दक शिरकत कीनीं उप समिति री काल व्हेवण वाळी मीटिंग मांय जोधपुर, भरतपुर अर जयपुर संभाग रा नगरीय निकायां रा ओजू गठन अर सीमांकन रा प्रस्तावां माथे विचार क्यो जावेलां

000

झुंझुनूं मांय व्ह्या सुभाष हत्याकांड ने ले र पैली वाळा मंत्री राजेन्द्र सिंह गुढ़ा री अगुवाई मांय आज आक्रोष रैली निकाळी ज्यीं रैली मांय शामिल लोग जबरदस्ती कलेक्टर रा दफ्तर मांय घुसबा री कोशिश कीनी, ज्यां ने पुलिस जाब्ता री मदद ऊं रोकी ज्यां पुलिस ने हल्की जोर—आजमाइश ई करणी पड़ीं रैली निकाळण वाळा मरण वाळा सुभाष मेघवाल रा पिरवार ने माली मदद देवण अर वां रा पिरवाररा एक जणा ने नौकरी देवण री मांग कर रह्यां

000

राज्य मांय केई ठोड़ां आवता तीन—चार दिन ताई आंधी—बारिश रो दौर चालतो रेहवण रा आसार हैं दूजी कानी राज्य रा आतूणी हलकां मांय लू रो असर बण्यो रेहवण री शंका हैं मौसम विभाग रे मुजब जोधपुर, बीकानेर, उदयपुर, कोटा अर जयपुर संभाग रा कुछ हलकां मांय आज अंधड़ आवण सागे हल्की बिरखा व्हेवण री संभावना हैं ई बीचे लारला चौबीस घंटां मांय बांसवाडा, डूंगरपुर अर प्रतापगढ़ मांय रिमझिम बरसात व्हीं बाड़मेर, जोधपुर, फलौदी, कोटा अर चित्तौड़गढ़ मांय जोरदार गर्मी अर लू रो असर रह्यो

000

जयपुर रा जिला कलेक्टर डॉ. जितेन्द्र कुमार सोनी चौमासा ऊं पैली बाढ़ नियंत्रण अर बचाव सारु जरूरी इंतजामात करण रा हुकम दीना हैं वे आज आपदा प्रबंधन प्राधिकरण री मीटिंग ले र चौमासा ऊं पैली री तैयारियां रो जायजो लीनों डॉ. सोनी निगम रा अहलकारां ने नाळां री सफाई रो काम बेगो पूरो करावण रा हुकम दीनां

000

जयपुर—दिल्ली नेशनल हाई—वे माथे विराटनगर हलका मांय आज एक सड़क हादसा रे कारण तीन जणां री मौत व्हे गयी अर चौबीस जणा जखमी व्हे ग्यां कोटपूतली रा एडिशन एस.पी. वैभव शर्मा बतायो के आंतेला गांव कने हरियाणा रोड़वेज री बस अर ट्रैलर बीचे टक्कर रे कारण व्ह्या ई हादसा रे कारण जखमी लोगां ने न्यारा—न्यारा अस्पतालां मांय भर्ती करायी ज्या है अर हादसा रा कारणां री ठा करी जा रही हैं

देश रा पहला प्रधानमंत्री पंडित जवाहर लाल नेहरू ने आज वां री बरसी रे मौके सिरधाभाव सागे याद कर्या जा रह्या हैं ई मौके प्रधानमंत्री नरेन्द्र मोदी ई पंडित नेहरू ने याद कीनां पंडित नेहरू री बरसी रे मौके आज हनुमानगढ़, भीलवाड़ा अर पाली समेत केई ठोड़ां श्रद्धांजलि कार्यक्रम राख्यी ज्यां

000

दक्षिण कोरिया रा गुमी मांय व्ही एशियाई एथलेटिक्स चैंपियनशिप मांय भारत रा गुलवीर सिंह पुरुषां री दस हजार मीटर दौड़ मांय सोना रो तमगो जीत्यो हैं वे 28 मिनट 38 दशमलव छह—तीन सेकंड मांय दौड़ पूरी कर र अव्वल रह्यां भारत रा सर्विन सेबेस्टियन पुरुषां री 20 किलोमीटर पैदल चाल होड़ मांय कांसा रो तमगो जीत्यो सर्विनएक घंटा 21 मिनट अर 13 दशमलव छह सेकंड मांय दौड़ पूरी कर र ओ तमगो जीत्यो

000

आई.पी.एल. क्रिकेट होड़ रा तैत आज रॉयल चैलेंजर्स बेंगलुरु अर लखनऊ सुपर जायंट्स बीचे मुकाबलो व्हेलां ओ मैच अब ऊं थोड़ी देर पछे साढे सात बज्यां लखनऊ मांय सरू व्हेलां रॉयल चैलेंजर्स बेंगलुरु, प्लेऑफ मांय खेलण री काबिलियत हासिल कर चुकी हैं रॉयल चैलेंजर्स बेंगलुरु हाल ताई 17 अंक ले र तीजी ठोड़ माथे है, जद के पंजाब किंग्स 19 अंकां सागे अव्वल हैं गुजरात टाइटन्स 18 अंक सागे दूजा अर मुंबई इंडियंस चौथा नम्बर माथे हैं

000